

Na Merca riba caso Holloway:

CNN, un profesor di ley y un polis retira cu mas critica riba investigadornan local

ORANJESTAD (AAN) — “Hopi pregunta riba e caso na Aruba” ta e titulo cu por lesa riba internet CNN.com, den un informacion cu a circula ayera.

CNN ta subraya cu manera e caso di e desaparicion di e top estudiante di Alabama ta move, tin preguntanan na abundancia riba e Autoridadnan Arubiano cu ta maneha e caso aki; esun di mas profile na nos Isla, den decadanan.

Un di e preguntanan ta di con e tres hobennan cu a worde mira cu Natalee Holloway na ultimo, a worde laga den libertad despues cu el a disparce? Pakico polis no a listra e cas di e hoben Hulandes ken tabata “flirt” cune den e dos siman prome di su desaparicion? Pakico e oficialnan Arubano a pidi FBI pa trece buceadornan cu a bin Aruba, pero nunca a busca den su awanan?

Segun expertonan criminalista e aparente contratempo aki por a haci mas dificil pa e investigadornan Arubano aclarea e caso, y na ultimo

instancia por a impedi e famia Holloway haya sa kico a sosode.

Nan ta cuestiona tambe cu mr. Caren Janssen, e Fiscal Mayor na Aruba, a rehusa di duna comentario riba e criticanan y implicacionnan potencial, bisando so: “Mi no por comenta mientras e investigacion ta tumando lugar. Mester permiti e investigadornan haci nan trabao”.

Nan ta reitera cu Joran, y e rumannan Kalpoe tabata e ultimo personanan cu a worde mira cu Holloway “e top estudiante di Mountain Brook, Alabama”, kende a disparce riba dia 30 di Mei su ultimo dia di vacacion cu 124 estudiante mas cu a bin celebra nan graduacion di high school, y ken a laga su passport y maleta empaketa den e camber di hotel.

Y asina nan ta sigui elabora riba e resto di e historia y kico nan a declara na polis, unda nan ta bolbe cuestiona sra. Janssen ken a bisa cu nan a laga e tres hobennan bay pa “razonnan tactico” cu expectativa cu asina nan lo

por a conduci e autoridatnan riba algun pista.

“Esaki tabata un eror”, segun Joseph Pollini, un profesor den Husticia Criminal na John Jay College na New York, kende a traha 33 aña como detective di homicidio. Asina CNN ta apunta. “Un bez laga den libertad e ta un problema pasobra un hende por guia nan”, el a bisa, agregando cu simplemente nan por sigui e consejo di un abogado di no bisa nada. CNN a indica cu Pollini ta duda cu cualkier confesion lo ta posible mas.

Tambe un hefe policial retira di Alabama, yama Ron Watson, a duna su opinion y el a bisa cu “nan mester a haci un test forense di inmediato na cas di van der Sloot, su paña y su auto y mescos riba e rumannan Surinameño. E polis aki, kende a traha den e negoshi di reconstruccion di crimen, a agrega: “Bo tin 24 ora despues di e desaparicion pa actua. Despues di esey bo ta den e zona cora y podise nunca mas lo bo haya e persona”.

Tambe ta worde cuestiona cu

polis no a interroga e tata di e hoben sospechoso, Paul van der Sloot, prome cu dia 17 di Juni cu un movecion sorpresivo el a worde aresta riba diahuebs.

Pa loke ta trata e famia di Natalee segun CNN nan ta vociferando nan criticanan mas y mas. Delaster fin di siman, Jody Bearman, e señora cu a organiza e viahe pa Aruba, a declara pa “The Associated Press” cu ta e famia Holloway y no polis, kende a identifica y localiza e mucha homber Hulandes, y cu el a insisti pa polis bay cune pa interroga famia van der Sloot.

“E mama di Natalee repetidamente a bisa cu e tres hobennan aki sa mas di loke nan ta bisa y cu polis mester presiona nan pa bisa e berdad. El a agrega cu prome cu van der Sloot a worde aresta y nunca a haya contesta lihe, y cu e mester a pensa cu autoridatnan local tabata protehendo e sospechoso pasobra e ta yiu di un oficial hudicial na Aruba”, CNN ta remarca.

Mientras tanto e autoridatnan Arubano ta defende nan maneho di e caso, bisando cu un trabao meticoloso di polis ta tuma tempo.

Nan ta transcribi e palabranan di mr. Janssen: “Bo mester lanta un investigacion. Bo no por simplemente bay den dje na

estilo cowboy”. Aki nan ta bisa cu tin hopi pregunta riba e esfuerzonan haci pa haya Natalee.

CNN tambe ta critica e hecho cu polis Arubano, Marina Hulandes, siete agente di FBI y miles di turista y hendenan local a busca na hanchu y largo di e Isla sin exito, y riba e prome dianan autoridatnan Arubano a pidi FBI ayudo di divers experto, y un agencia Mericano a manda dos buceador experto den buskeda y rescate pero nunca nan a bay bao di awa.

“Nunca nan a haya informacion den cual area e hoben por ta” segun e vocero di FBI Judy Orihuela a bisa. “E tarea ey mester a worde haci pa investigadornan di Aruba pasobra nos no por investiga den un pais stranhero”, el a agrega.

E buzo Joe Huston, a califica di “bizarre” e decision aki.

Pa ultimo CNN a seña cu e abogado local Lincoln Gomez, kende no ta conecta cu e caso a bisa cu “na final e investigadornan lo worde huzga pa loke nan ta capaz di genera na pregunta y nan conviccion si acaso un crimen a worde comete”.

Gomez a agrega: “Mira for di pafo e hendenan no por compronde e sistema y nan por tin escepticismo, pero e autoridatnan a haci hopi esfuerzo y nan ta trahando rapido”.

Hopi ta desea aclaracion di e caso Holloway pa por fin “bira e blachi”

ORANJESTAD (AAN)— Henter e situacion di e desaparicion di Natalee y e misterio cu tin tras di esaki no ta stop di traha riba e comunidad di Aruba, cu ta desea pa e asunto aki worde aclarea pa por fin “bira e blachi” na e capitulo final, cual cu sea e desenlace.

Un ponencia cu por a scucha hopi ultimamente ta cu e hoben simplemente a somenta for di Aruba pa boluntad propio podise pasobra e tabata haya hopi presion di su famia y su comunidad, cu a pone riba un pedestal lubidando cu e ta un hoben manera otro, y cu kizas su deseonan real ta diferente na loke nan a expect di dje.

Otro hipotesis ta cu e hoben por tabata tin problema cu su padraastro, pero e motibonan cu ta worde “sospecha” pa diferente persona cu ta kere den esaki, ta delicado pa nos mencione.

Cerca un cantidad grandi di persona e speranza cu e hoben aki ta na bida ta keda bibo, y ta importante pasobra esaki kiermen cu tin fe cu nada malo a pase, y cu e ta na otro parti di mundo y cu na momento cu nada mas worde bisa, e berdad lo sali dilanti pa sorpresa di nos tur.

Mara ta asina berdad! Un otro posibilidad cu hendenan ta menciona ta cu e hoben a dicidi di bay landa den madrugada, sin cu ni un hende a mire, y cu e coriente di lama a bay cune kizas sin cu e mes tabata sa kico ta pasando, ya cu tin indicacion cu e no tabata sobrio.

Loke si tur hende tin hopi cla ta cu e desaparicion di Natalee no solamente ta caba e noticia di aña, pero e noticia di e siglo aki tambe pa Aruba, cu lamentablemente a afecta nos pais mental, moral y economicamente ya cu segun un par di hende cu ta traha den hotel, si tin reservacionnan cu a worde cancela.